

**Fructus Vanillae.**

Vanille.

*Vanilla.**Vanilla planifolia Andrews. Orchideae Juss.*

XX. 1. L.

Capsulae non plane maturae, subcarnosae, compressae, sex ad novem pollicēs longae, duas ad quatuor lineas latae, striatae, coloris fuscī, crystallulis saepe inspersae, pulpa farctae granulosa, saporis suavissimi et odoris Balsamo Peruviano similis, e seminibus simulata innumerabilibus, minutissimis, atris, strato tenuissimo balsamico obtectis et conglutinatis.

**Gallae.**

Galläpfel.

*Gallae Halepenses. Aleppische Galläpfel.*

Excrescentiae ictu *Cynipis Gallae tinctoriae Olivier* in gemmis *Quercus infectoriae Olivier* et aliarum affinium specierum ortae, subglobosae, verrucosoechinatae, saepe foramine praeditae, ponderosae, durae, coloris e subviridi cinerei vel obscurioris vel pallidioris, manducatae adstringentes.

**Gelatina.**

Weisser Leim.

Sit et coloris et odoris paene expers.

## Glandulae Lupuli. Hopfendrüsen.

*Lupulinum. Hopfenmehl.*

**Humulus Lupulus L.** Urticaceae *Juss.* XXII. 5. *L.*

Pulvis aureus, deinde aurantiacus, e glandulis minutis, brevissime stipitatis subreniformibus constans, odoris peculiaris, saporis amari. Glandulae a strobilis lupuli recens siccatis ope cribri setacei separandae nec ultra annum servandae sunt.

## Glycerinum. Glycerin.

Liquor spissus, limpidus, coloris et odoris expers, ponderis specifici = 1,23, saporis dulcis, in aquae et spiritus vini rectificatissimi quantacunque copia solubilis.

Sit a calcaria et a plumbo oxydato liberum, in aëre ignitum residuum nonnisi valde exiguum relinquens.

## Gummi Arabicum. Arabisches Gummi.

*Gummi Mimosae. Mimosengummi.*

**Acacia Seyal Delile** et **Ehrenbergiana** et **tortilis Hayne.**

**Mimoseae R. Brown.** XXIII. 1. aut XVI. 5. *L.*

Frusta magis minusve globosa, sine colore vel subflavescentia, subnitida, diaphana, diffracta in frustula parva, angulata pellucida, vitreo splendore nitentia, fractura conchulata dissilientia, saporis et odoris nullius. Cum partibus sex vel octo aquae solutum fluidum praebeat.

**Gummi-resina Ammoniacum.**  
 Persisches Ammoniakgummiharz.

*Ammoniacum. Gummi Ammoniacum.*

**Dorema Ammoniacum** *Don. Umbelliferae Juss.*

**V. 2. L.**

Grana saepe inter se conglutinata vel massae subfuscae intermixta, extus e flavo subfusca, fractura leviter conchata, lactea, pinguius nitida, frigore duriuscula, calore mollescentia, saporis amari, nauseosi, odoris gravis.

Ad parandam Gummi-resinam Ammoniacum depuratum gummi-resina electa tempestati gelidae exposita terendo redigatur in pulverem, ab adhaerentibus quisquiliis ope cribri separandum.

Charta involuta loco frigido servetur.

**Gummi-resina Asa foetida.**

Stinkasant.

*Asa foetida. Teufelsdreck.*

**Scorodosma foetidum** *Bunge. Umbelliferae Juss.*

**V. 2. L.**

Grana saepe inter se conglutinata vel massae subfuscae intermixta, extus e roseo subfusca, fractura recenti leviter conchata, pinguius nitida, lactea, paulatim purpurascens, frigore duriuscula, calore mollescentia, nidoris alliacei, saporis subamari.

Gummi-resina Asa foetida depurata e gummi-resina electa eodem modo et paratur et servetur, quo Gummi-resina Ammoniacum depurata.

**Gummi-resina Galbanum.**

Mutterharz.

*Galbanum. Gummi Galbanum.***Galbanum officinale** *Don* et *Ferula erubescens Boissier.*  
*Umbelliferae Juss. V. 2. L.*

Massae e subviridi et subfusco luteolae, manus calore emolliendae, aestate facile diffluentes, frigore fragiles, paullum splendentes, granis vel frustulis saepe intermixtis, coloris albidi, vel luteoli, saporis amari, odoris gravis subnauseosi.

Grana sicca, subflava, intus albida, olei aetherei minorem copiam continent, quapropter praeferenda non sunt.

**Gummi-resina Galbanum depurata** e gummi-resina Galbano paretur eodem modo, quo **Gummi-resina Ammoniacum depurata.**

**Gummi-resina Gutti.**

Siam-Gutti.

*Gutti. Gummi Guttac. Gummigutt.***Arbor ignota Siamensis** ex ordine **Guttiferarum.**

Frusta compacta, fragilia, circa angulos paullum diaphana, fractura conchata, cerae instar nitentia, coloris aurantiaci, trita citrini, madefacta laete flavi, inodora, manducata initio sapore vix ullo, demum subdulci, os urentia.

**Caute serva.**

**Gummi-resina Myrrha.**

Myrrhe.

*Myrrha.*

**Balsamodendron Ehrenbergianum** *Berg*, fortasse et  
**Balsamodendron Myrrha** *Nees*. *Burseraceae Kunth.*

VIII. 1. L.

Frusta vel grana friabilia, diaphana, e rubro fusca, pinguius nitida, saporis amari, odoris peculiaris. Pro majore parte in aqua solutione flavo-fusca, turbida, pro minore parte in spiritu vini rectificatissimo solvitur solutione flavo-fusca, limpida, adjecto acido nitrico violacea.

Rejiciantur gummi-resinae Bdellii frusta saepe admixta coloris obscurioris, odoris diversi, gravioris, quae in spiritu vini rectificatissimo soluta acido nitrico addito colorem violaceum non induunt.

**Gummi-resina Olibanum.**

Weihrauch.

*Olibanum. Thus.*

**Boswellia serrata** *Colebrooke* et *papyrifera Hochstetter.*

*Burseraceae Kunth. X. 1. L.*

Grana oblonga vel subglobosa, laevigata, coloris ex albido luteoli vel subrufi, serius obscurioris, extus opaca, quasi pulvere inspersa, fragilia, fractura plana, cerea, diaphana, saporis subamari, quum accenduntur fragrantia.